

Úrskurður Tollstjóra nr. 17/2017

A kærði til Tollstjóra tollflokkun ökutækis af gerðinni Mercedes-Benz Sprinter og krafðist að ökutækið yrði tollflokkað sem sendibifreið í tollskrárnúmer 8704.2199.

Tollstjóri taldi ljóst af útliti og hönnun umþrætts ökutækis að það væri ætlað til að ferja bæði farþega og varning. Var litið til atriða í skýringabókum Alþjóðatollastofnunarinnar til aðgreiningar á ökutækjum sem falla undir vörulið 8703 í tollskrá, þ.e. bifreiðar sem aðallega eru gerðar til mannflutninga og vörulið 8704, þ.e. bifreiðar sem ætlar eru til vöruflutninga.

Kærandi benti á að hann hafi boðið Tollstjóra að breytingar yrðu gerðar á ökutækinu áður en það yrði tekið til tollmeðferðar og samkvæmt skráningu Samgöngustofu yrði ökutækið skráð sem sendibifreið.

Tollstjóri vísaði í úrskurði sínum til meginreglunnar um að vörur séu tollflokkaðar og þ.a.l. tollafgreiddar í því ástandi sem þær eru í við innflutning til landsins, auk þess að Tollstjóri sé bundinn af tollalögum og tollskrá við tollflokkun. Það hafi ekki áhrif á tollflokkun hvernig ökutæki sé skráð hjá Samgöngustofu eða flokkist samkvæmt reglugerð um gerð og búnað ökutækja nr. 822/2004.

Var niðurstaða Tollstjóra að tollflokka ætti ökutækið undir vörulið 8703, nánar tiltekið 8703.3240.